

pinnatipartitis laciniâ terminali longissimâ, capitulis mediocribus abbreviatis, involucri ad apicem phyllorum floccosi vel omnino lanati phyllis intus puberulis, flosculis externis involucri duplo longioribus, acheniis junioribus glabris ②.—*Podospermum Cariense* Boiss. Diagn. Ser. I, 4, p. 24.

Hab. ad rupes Cariæ (Pinard!), Pisidiæ ad pagum Tchelticktchi prope Bouldour (Heldr!).

Sesquipedalis, folia radicalia petiolis latis suffulta 6-9-pollicaria. Præter folia tenuissima et floccosa involucri abbreviato et ligulis elongatis a formis *S. laciniatæ* distincta.

4. **S. radicata** (Boiss. Diagn. Ser. I, 11, p. 43) rhizomate verticali pluricipiti indurato dense pulvinato-cespitoso, foliis sub lente minute et crispule canescentibus anguste linearibus flexuosis integris vel in lobos minimos ovatos vel breviter lineares pinnatifidis canaliculato-plicatis, radicalibus confertissimis, caulibus tenuibus flaccidis nudis monocephalis folia æquantibus vel 2-3-cephalis parce foliosis folia duplo superantibus, capitulis parvis obconicis paucifloris, involucri phyllis canescentibus anguste membranaceis acutiusculis ab externis ad interna elongatis laxiusculis, flosculis luteis extus rubellis involucri tertîâ parte longioribus, acheniis... ¼.

Hab. in glareosis alpium Hasartschal in jugo Elbrus occidentali Persiæ borealis 10000' (Ky. 4921), huc quoque probab. specimen incompletum e monte Elamout (Auch. 4757!).

Folia 1-1 ½-pollicaria lineam lata, facies et capitula *S. pygmeæ* et affinium sed ob folia pinnatilobata probabiliter *S. Jacquiniæ* approximanda. Fructus inquirendi.

5. **S. bulbipes** (Boiss. et Haussk.) parce pubescens demum glabrata, radice verticali, collo valde squamato, caulibus foliosis ascendentibus simplicibus vel a medio parce et stricte ramosis 1-3-cephalis, foliis radicalibus elliptico-oblongis obtusiusculis denticulatis breviter in petiolum attenuatis, caulinis a basi late amplexicauli-auriculatâ acute pinnatifidâ vel laciniatâ oblongis vel lanceolatis acuminatis, capitulis majusculis longe pedunculatis, involucri ovati farinoso-puberuli demum glabrescentis phyllis arcte imbricatis ab infimis transverse latioribus cordatis breviter acutatis ad intima obtusissima elongatis, flosculis e sicco flavidis involucri subduplo longioribus, antheris brunneis, acheniis stipite cavo pyriformi superne globose incrassato suffultis brevibus grosse costato-sulcatis lævibus pappo sordido superatis ¼.

Hab. in subalpinis Kurdistanæ Persiæ in monte Pir Omar Gudrun 4000' (Haussk!) et prope Mendeli (Noë exs. p. 1170!). Huc etiam refero specimina florifera e desertis Assyriæ prope Ras el Ain et Kotschassar (Haussk!).

Pedalis et elatior, folia inferiora 4-5 pollices longa 2 lata, capitula et involucrium *S. Libanoticæ* et *incisæ* sed paulo breviora. Species insignis stipite achenii pyriformiter inflato achenio ipso non multum breviora, hæc notâ *Podospermis* adnumerata sed omnibus aliis notis *S. incisæ* arcte affinis.